

28 JAN 2003

Galeria

LEBIH 260,000 PELANCONG KUNJUNGI GALERIA PERDANA TAHUN LEPAS

LANGKAWI, 28 Jan (Bernama) -- Galeria Perdana yang menempatkan kira-kira 8,000 koleksi cenderahati Perdana Menteri dan isteri di sini, dikunjungi seramai 267,701 pelancong dalam dan luar negara sepanjang tahun lepas.

Galeri di Kilim itu mencatatkan kunjungan pelancong paling ramai sebanyak 37,633 orang pada Disember semasa cuti persekolahan penghujung tahun yang panjang.

Pengurus Galeria Perdana Mahani Muhammad berkata jumlah kunjungan pelawat itu menunjukkan pertambahan sebanyak 14,810 orang berbanding 252,891 orang pada tahun sebelumnya.

Galeri itu dibuka kepada orang ramai sejak 1996 bagi memberikan peluang mereka menyaksikan ribuan koleksi cenderahati yang diberikan para pemimpin dan tokoh dunia serta tempatan kepada Datuk Seri Dr Mahathir Mohamad dan Datin Seri Dr Siti Hasmah Mohamed Ali.

Sebanyak RM3,397,521 telah dikutip hasil jualan tiket sepanjang tempoh itu, kata Mahani.

"Galeria Perdana mengutip sebanyak RM622,262 hasil jualan tiket sepanjang tahun lepas berbanding RM615,476 tahun sebelumnya dan kutipan itu jauh lebih besar berbanding kutipan sebanyak RM225,139 apabila galeri mula dibuka kepada orang ramai sepanjang 1996," katanya.

Galeri seluas 5,332 meter persegi itu menggabungkan dua bangunan dua tingkat berekabentuk senibina Oriental.

Mahani berkata dua blok bangunan baru bernilai hampir RM24 juta sedang dibina untuk menempatkan cenderahati secara lebih sistematik. Ia turut mempunyai kemudahan auditorium dengan 150 tempat duduk yang dilengkapi sistem audio.

Blok itu akan menempatkan surau, kedai cenderahati, kafeteria dan kemudahan makmal untuk menjalankan kerja-kerja pemuliharaan cenderahati dan akan dihubungkan dengan bangunan sedia ada menerusi jalan masuk yang dibina dari tingkat bawah lama ke tingkat atas bangunan baru itu.

-- BERNAMA

NH RON